

Chrysididarum species novae vel parum cognitae (Hymenoptera).

Auctore

**Andrea Semenow**, petropolitano.

---

II \*).

**Pseudochrysis sphinx**, sp. n.

? *Polyodontus Stchurovsky* (sic) Radoszkowski in: Путешествие въ Туркестанъ Федченко, II, 5, 1877, стр. 25, табл. III, фиг. 2: ♀ (perperam?) (verisim.=♂)<sup>1)</sup>.

♂. *Euchroeus* (sensu nostro<sup>2)</sup>), major, subrobusta, lateribus parallela, purpureo-aenea, cavitate faciali et fronte saturate violaceenti-cyaneis, illâ medio inter antennas maculâ viridi nonnunquam notatâ, hac supra in azureum vergente, viridi-aureo-limbata, pronoto majore ex parte, mesonoto ad margines et suturas, scutello partim, postscutello fere omnino viridi-auratis, abdominis dorso toto saturatus purpureo, pedibus intermediis et posticis violaceenti-purpureis, tarsis omnibus subtestaceo-brunneis, ventre purpureo, violaceo, viridi et nigro variegato; clypeo et ore piceis, mandibulis

---

<sup>1)</sup>) Cf. Revue Russe d'Entom., I, 1901, pp. 23—27.

<sup>2)</sup>) Descriptio et icon valde inexactae esse videntur. Praeterea praesumo, marem pro feminâ a Radoszkowski perperam descriptum esse.

<sup>2)</sup>) Cf. A. Semenow: Horae Soc. Ent. Ross., XXVI, 1892, p. 486.

medio testaceo-rufis. Antennis testaceo-brunneis, scapo purpureo supra chalybaeo-virescenti, articulo insequente laete aeneo-refulgenti, 3<sup>o</sup> vix nisi metallescente; scapo longo, tres articulos sequentes unitos etiam paulo superante, pedicello articulo 4<sup>o</sup> vix nisi breviore, articulo 3<sup>o</sup> praecedente plus quam sesqui (circ. 1,7) longiore. Capite lato, cum oculis summam latitudinem pronoti distincte superante, aspectu desuper sat brevi, aspectu a fronte fere triangulari; fronte, vertice et occipite pube tenui suberectâ parce indutis, cavitate faciali glabrâ; occipite crebre, vertice remotius (praesertim utrinque inter orbitam et stemmata) punctato, fronte punctato-rugulatâ, rugis longitudinaliter directis, medio carinâ acutâ longitudinali praeditâ, margine superiore obsoleto utrinque carinulam obliquam stemma anticum in areolam triangularem occludentem emittente, cavitate faciali medio profunde impressâ, minute sed fortiter transversaliter punctato-rugulatâ, rugis in medio (fundo) arcuatis, superne plicâ obsoletâ perparum subangulato-arcuatâ a fronte separatâ; clypeo ad apicem declivi, parce punctato, apice medio manifeste emarginato; genis brevissimis, antennarum articulo 2<sup>o</sup> (pedicello) brevioribus; temporibus angustis; oculis magnis, convexis, late ovalibus, orbitis internis deorsum fere ad 2/3 usque convergentibus; mandibulis subelongatis, intus ante apicem dente validiusculo acutoque armatis; ligulâ cum maxillis valde porrectâ, longe exsertâ. Pronoto valde brevi et lato, lateribus ante angulos posticos valde retrorsum porrectos apiceque anguste lobi- vel potius linguiformes (etiam aspectu desuper) leviter sinuatis, angulis anticis obtusis, apice fortiter (fere verticaliter) declivi, toto haud confertim profunde fere scrobiculatum punctato, interspatiis punctorum subtilissime disperse punctulatis, medio fossuliformiter longitudinaliter impresso, qua impressione marginem posticum non tangente; hoc late arcuatim exciso; mesonoto longitudinem pronoti plus quam sesqui superante, convexo, similiter atque pronotum sed paulo subtilius sculpto, lobo medio angusto, suturis parapsidalibus manifestis; mesopleuris paulo fortius, eodem modo ac pronotum sculpto, supra sulco carentibus, parte inferiore sulco profundo separata infra angulum acutum deorsum spectantem efficiente; tegulis eodem modo atque mosonotum sculptis; scutello convexo paulo grossius et parcus quam mesonotum fere perforato-punctato; postscutello subgibbosim convexo crasse scrobiculato; angulis postico-lateralibus metathoracis similiter atque mesopleurae sculptis, parum

prominulis, subhamiformiter retrorsum incurvis. Abdomine capite thoraceque simul sumptis haud longiore, oblongo-rectangulari, lateribus subparallelo, dorso convexo, segmentis duobus basalibus fortiter profundeque subremote, 3<sup>o</sup> valde crebre punctatis; segmento 2<sup>o</sup> primo multo, tertio paulo longiore, valde convexo, angulis postico-lateralibus simplicibus; segmento 3<sup>o</sup> lato, ad apicem fortiter declivi, pone medium vix distinete transversim subimpresso, supra seriem antepicalem fere non incrassato, hac margini postico per quam approximatâ, parum immersâ, foveolas circiter 22 haud magnas, inter se sat discretas continente, medio haud interruptâ; margine postico arcum valde latum et planum formante, dentibus concoloribus longe acuteque spiniformibus, inter se subaequalibus atque sat aequabiliter distantibus numero circiter 18 coronatim ornato, emarginaturis profundis fundo rotundatis, utrinque ad basin spatio marginis integro, non dentato. Segmentis ventralibus leviter punctulato-alutaceis. Femoribus anticis similiter atque mesopleurae (etsi paulo subtilius) sculptis; tibiis subtilissime albido-pubescentibus et pilosulis; tarsis posticis articulo basali reliquis simul sumptis paulo breviore. Alis hyalinis, secundum marginem posticum infumatis, nervis fuscis, anticis n. subcostali a costali valde remoto, cellulâ radiali latissime, fere usque ad medium apertâ.

♀. Valde differt a mare staturâ graciliore, capite majore, latitudinem pronoti multo superante, oculis magis adeo convexis, cavitate faciali et fronte vertici concoloribus, purpureo-aeneis, hac similiter atque vertex sculptâ, ad limitem cavitatis facialis callositate plus minusve indicatâ in medio notatâ; abdomine oblongo-subovato, lateribus haud parallelo, apice multo magis acuminato, segmento 3<sup>o</sup> multo angustiore ad apicem angustato, margine postico arcum fere angulatum effidente, dentibus longis spiniformibus multo minus numerosis (numero circiter 13) armato; segmentis protractilibus (tubulo) dilute brunneis, segmento 5<sup>o</sup> dorsali longitudinaliter sulcato, utrinque pluridentato, denticulis basalibus obtusis lobuliformibus.—Variat abdominis dorso partim chalybaeo.

Long. ♂ 9, ♀ 8—9 mm.

*Chiva*: curs: infer. fluvii Amu-darja (C. Rossikow! VI. 1898).—Quattuor specimina (1 ♂, 3 ♀) (coll. P. Semenow).

Procul dubio solummodo *Pseudochrysidi shtshurovskii* (Rad.) proxime affinis, quacum speciem nostram jungere nequeo, nam species Radoszkowskiana, si descriptioni auctoris fides tribuenda, ha-

bet abdomen confertim punctatum segmento 3<sup>o</sup> coriaceo margine postico dentibus 11 tantum armato, foveolis seriei anteaapicalis confluentibus, antennas rufas tribus articulis basalibus violaceis, pedes cyaneo-violacescentes, alas omnino sordidas. A reliquis membris subgeneris *Euchroei* (Latr.) Dahlb. longius distat jam ob structuram singularem 3<sup>ii</sup> segmenti abdominalis, capitis, cet. Species aequè pulchra atque peculiaris.

**Pseudochrysis virgo** Sem. 1891.

*Pseudochrysis (Spintharis) virgo* A. Semenow: Horae Soc. Ent. Ross., XXV 1891, p. 441.

*Chrysis virginalis* R. du Buysson in Edm. André, Spec. Hymén. d'Eur. et d'Algér., VI, 1896, pp. 264, 629.

♀. Segmentis abdominalibus protractilibus (tubulo) brevibus brunneis, 5<sup>o</sup> dorsali apice in angulum sursum dentiformiter eminentem producto.

Doleo, me feminam hujus speciei cum ♂, cuius unicum specimen in collectionem Musei Zoologici Petropolitani a me olim ascriptum est, comparare non posse.

Hab. etiam in *Persia orientali*: distr. Sarhad (Kerman septentr.) (N. Zarudny! 7—8. V. 1901) [solum specimen ♂ in coll. P. Semenow].

Hujus speciei nomen sine ullâ causâ mutare tentavit Buysson, nam non solum in genere *Pseudochrysis* Sem., a Buysson mirum in modum nondum percepto, sed etiam in genere *Chrysis* (L.) (sensu Mocsáry, Buysson) nulla est species „virgo“. *Chrysis* autem *virgo* Ab. (= *Chr. pumila* Klug.), ut jam diu constat, est generis *Chrysogona* Först. membrum.

---